

Dèwà She Zwimbyi' Sɛ Piêr Kɔe

Mè hwæsi Piêr

1 ¹Mùn Piêr, ci-ntwum Yesù Kristò nɛ ta dèwà ton se kɔi lè byin bɛ Mvènnswæb yànnà, byin bɛ ton wě mè kyin bɔwum kɛ cě ngyɔ' wan, byin nywæleá kɛ mɛ ngyɔ' kyikyɪ nun, bye le: Pôn, Gàlàsì, Kàpàdosi, Àzì, lè Bitinì. ²Be lè Ce nye' Mvènnswæb yilá lè à yæn byin, bǎ byin bɛ bɔwum byon kɛ ñkimmɔ' Mpùn Nsanmi nun, byin bɛ tì ku' ywɔli lè Yesù Kristò, bɛ konndì byin sannzi lè mvæb yon. Mvènnswæb suku' byin ngyànni li, à fe byin floa kwan hwæn.

Ñzison she nywæb she bwi' cinni fya' Mvènnswæb

³Bwi' feèni ñtwu lè Mvènnswæb nɛ dýi Ce Nyeli nye' Yesù Kristò. Ke kwènnzì nlim shon nun, à feá bwi' ñzison she nywæb kɛ nyé Yesù Kristò nɛ nun yimnze kɛ ywi nun. Li nɛ ci bwi' ta zwùm tɛli lè nun le bwi' ye ñzison she nywæb màzwùm cinni fya' yon. ⁴Bwi' ta tì ku' zwùm tɛli lè lwen nɛ Mvènnswæb lwæsi kɛ dɛb lè bɔwum byon. Lwen màzwùm bǎ nyé yě mlò' nun, shìkì à gwàn, shìkì à bɔwusi ku' lwu shon. Mvènnswæb lwæsi nun lè byin bɛ ta ñlim ké kɛ nywi Yesù Kristò, ⁵à tà byin bɔn lè ñkimmɔ' yon bǎ kwan se mmlòkà' ngyɔ' wan ye wòli, à yě mbyi nɛ nun fɔsi bǎ nun swæti byin nun lisea.

⁶Ke ntwi' ywum màzwùm, kwo fe' she byin ta mè pa' mè vèné' yenni mèan kɛ kwan kwæ' si nun, dàlèni. ⁷Mè vèné' màzwùm tá byin bènni nywi bǎ bɛ limmì bɛshe byin ta zwùm tɛli lè Mvènnswæb lè lɛŋkæm. À si wě tà she bɛ ta **gól** tweli, bɛ seti nun twènni kɛ win lè bɛ yɛn bɛshe nun nɛ' **gól** nɛ. **Gól** màzwùm ni swum sɛ ye mlò' kwan ndò', son, ñtè' zwum lè Mvènnswæb yi swum twun, a lan **gól**. À si swum sɛ ye byin ñtwu fe ñzwɔnzwò', lè ñkimmɔ' nun hwæn kwan sɛ Yesù Kristò yě fyònni bɛ.

⁸Kwo fe' she byin yɛn kife' Yesù si, byin ta nun yili. Kwo fe' she byin yɛn kan nun jɛnɛ, byin ta zwùm tɛli lè nun. Li nɛ ci byin ta dàli ñzwɔnzwò', han ñdàli twun màzwùm fe byin tæ' nɔwum. ⁹Byin ta dàli ntwi' swum

se byin ta zwùm tɛli lè son, byin ye son cinni. Swum màzwùm si le Mvènnswàb yě byin swàti.

¹⁰Kwan se be mbyí, mè ci-nlɛli ke ɲwum Mvènnswàb nun be mbyi kæbbi lè bon limmì mbyi ne Mvènnswàb yě fyi bǎ nun swàti ðwum nun. Bon be lele mbyí mbò' tin ke nywi lwen ne Mvènnswàb yě byin cí ke kwènnzì nlim shon nun. ¹¹Mè ci-nlɛli ke ɲwum Mvènnswàb nun bi be tì ku' ðoli lè bon limmì kwan se ywum màzwùm ye lànnzì, lè mbòki ne ye ye tì ku' ðe. Ntwi' se M̀pùn Yesù Kristò be bon ke nywi, à shè bon le Yesù Kristò kà yenkà' vèné'. Ke nyě vèné' màzwùm, à yě ñtwu cinni. ¹²Mvènnswàb kònnde bon kwàsi le ywum màzwùm ða lànnzi ke kwan shan nun, son, a ye ðèn ke kwan shin nun. Jene ðwum ðye ta byin Ñtwum Lwen sannzi sheâ byin ywum màzwùm. Be ta byin yon shě lè ñkimmɔ' M̀pùn Nsanmi, nun ne Mvènnswàb fyie ñwaì ye ke ðɛb. Ywum màzwùm hwæn li, kwo fe' mè cikpu' Mvènnswàb ðye ðɛb yili ti ku' bon limmì yon.

Kwú kèn she Mvènnswàb yili le byin ðwon

¹³Li ne ci, dylèni mwù ke she Mvènnswàb nun, byin ton lè me', ða byin ke mè mbàkà' nyin ke swum ðin ndɔ' nun. Kèèni mè nlim nyin lè lwen ne Mvènnswàb ywime byin cí kwan se Yesù Kristò yě fyònni be. ¹⁴Byin be ywòli lè Mvènnswàb wě ðwen ðye ta ce nyan ywòli. Ba byin ke tì mè nlim nyin ke nywi ywum ye byin be tæm mbyí, lè byin ke ke ñjimmì nun. ¹⁵Son, kwú kèn shin be sanmi, mbanmbo' wě tà she Mvènnswàb ne lon byin ni ñsanmi. ¹⁶Be kɔ' ke ðewǎ Mvènnswàb nun le: «Mvènnswàb le' le: “Beèni ñsanmi ntwi' se mùn ni ku' ñsanmi.” »

¹⁷Ke me ɲkeli nyin nun, byin ta Mvènnswàb lon le Ce. Ke à si li, se yili le byin yi nun, byin ðwon mè kwú kèn lwukea ke kwan kwæ' se byin ke tòn fe ɲgyɔ' wan nun. Ntwi' se Mvènnswàb tà ka ñkyiili ké ke nyinnim ðwum nun. À tá she se mwum tá ci ce, á kà lin mè kàè'. ¹⁸Byin limmi seansean le Yesù Kristò libba' byin ke yi bè' me mbwè' ye mè mbibea byin lisae byin nun. À libba' kan mè mwù nyin lè lòn, shìkì à libba' nun lè gɔl ne kà mlòkà'. ¹⁹Son, à libba' mè mwù nyin lè mvæb sanmi yon. À ni wě mwèn nzwùmɲangan ne bon linne wě sàtikàè', shìkì à ðe ku' lè ðèm ndɔ' ke nywi. ²⁰Lè Mvènnswàb kà fɔ' ɲgyɔ' wan, be lè à yànnâ Yesù Kristò le à kiin she màzwùm cí. Ti jene ke mmlòkà' kwan nun, Mvènnswàb kwàsà nun ke pisean bǎ nun swàti byin. ²¹Ke ntwi' yon, byin ta ñlim ké ke nywi Mvènnswàb, nun ne yimnze Yesù ke ywi nun, à fe nun ñtwu. Li, byin ta ñlim ké ke nywi Mvènnswàb, byin te' tì ku' zwùm lè nun le à yě byin swàti.

²²Jene, à si wě byin pɔsà mè nlim nyin, byin fyonnâ sanmi ntwi' se byin ta ywum ɲkæmɲkæm ye Mvènnswàb tá lisà' mwumnzi. Li, byin ta mè ɲgyinni byin yili lè ñlim fɔ'. Ke à si li, kènnèni mbyí lè ñyili byin ne'

ke nyinnim shin nun. ²³Byin ti bwum bye be yeâ ye nyě nywæb ke ntwi' ŋkimmɔ' ye le' Mvènnswæb cinni. Le' Mvènnswæb ta bwum ñzison fe, se be ti ku' dɔwumdɔwum. Ñzison nywæb she byin cinni ba le mwum ne yě be shim lè à ywiâ ne fe byin son. Son, Mvènnswæb ne fe byin, nun ne bǎ ywi. ²⁴A si wě tà she be kœ ke dèwǎ Mvènnswæb nun, she be le' le:

«Mwum hwæn ni wě ñji kǎ'.

Ñtwu yon yi wě fluwà.

Kǎ' ta wum, fluwà nyon pyìd' ŋgyɔ'.

²⁵Son, ti lè ñzǎ' le' Mvènnswæb, ye ta tòn dɔwumdɔwum.»

Ñzǎ' le' ne tòn ne ni Ñtwum Lwen ye be sheâ byin nùn.

2 ¹Ke à si li, kesèni nywi lè ñci byebbi. Ba byin be mè ci-me mbwè', shiki byin be ku' mè ŋwum mbi-mbi. Ba byin tæm ywum bwulu, shiki byin be ku' mè ci-bòbo. ²Son, yilèni le' Mvènnswæb lè ñlim fɔ', wě bwennzea bye suku' mè nywon yili. Byin yili son li, bǎ byin klwɔka', a ken bèn kwan se Mvènnswæb yě byin swæti. ³Ntwi' se ke dèwǎ Mvènnswæb nun, à si kɔa le: «Byin yennâ wě tà she Nyeli nye' ni ñlim nlwen.»

⁴Kwemmèni le ke ke Nyeli nye' Yesù, nun ne d̄yi ñshimbyi' nye ye mè ci-ŋgwe nye nzwonnze, son, Mvènnswæb twele nun wě ñshimbyi' yon ne' ye lwen ke me' yon. Nun Yesù ne ta bwum ñzison fe. ⁵Byin ku', beèni wě ŋgǎ' mwu nye ye Mvènnswæb yě nye nyon gwe lè yon. Byin ye ti ku' be kwe ŋkwìn me ci-mfe sàtikǎ', bǎ byin fe byin ne' ke she Mvènnswæb nun lè ñlim fɔ' ke ntwi' Yesù Kristò. She màzwùm se ta nun ñlim lwukea.

⁶À si wě tà she be kœ ñzǎ' le' ndɔ' nyě wai ŋwum Mvènnswæb ke dèwǎ shon nun, nyě nun le' le:

«Mùn yǎnnâ ñshimbyi' nye ye lwen,

mùn kèâ yon jene wě ñshimbyi' nye ke **Sìon**.

Mwum ne yě zwùm tɛli lè yon bǎ hwæli.»

⁷Ñshimbyi' màzwùm yi swum twun ke me' yin, byin be ta mbyi Yesù d̄won. Son, ke ci bwum bye tà ka mbyi nyon yili, ye ba swum twun, son se ci be kœ ke dèwǎ Mvènnswæb nun le:

«Ŋgǎ' ne mè ci-ŋgwe nye nzwonnze ti jene ñshimbyi' nye.»

Be konndi tì kɔ' ke cì ndɔ' le:

⁸«Ñshimbyi' nye màzwùm yi swum nswili mba',

à yi ti ku' wě ŋgwɔ' nyě tǎ bwum pyisi ŋgyɔ'.»

Mbà' swiâ bon zwem ntwi' se bon byinnœ le bon bi ba mwù kě ke le' Mvènnswæb nun. Se ciâ bon li, bǎ ñyili Mvènnswæb lwinni.

⁹Ti lè byin, byin bi jene ŋkwìn bwum ye Mvènnswæb yǎn, byin be ti wě mè ci-mfe sàtikǎ' ke cì Mvèn ndwun. Byin ti bwum sanmea byon, byin konndi be ŋkwìn bwum bye ke fya' yon. Mvènnswæb kèe byin le byin she bwum ywum lwukea ye nun tǎ cì, nun ne lon byin, à kwannzi byin ke njimmi nun, à kè byin ke ŋwanŋwan twun shon nun. ¹⁰Kwan se

be mbyî, byin be kăn ñkwîn ðwum Mvènnswæb. Son jene, byin ti ñkwîn ðwum byon. Kwan se be mbyî, Mvènnswæb be kăn ñlim kwènnzi lè byin. Son jene, à ti ñlim kwènnzi lè byin.

Tòn she mwum wòli à tòn wě ci-she Mvènnswæb

¹¹Mè ñwè byêm, mùn tà byin swulea le, mbòkì ne byin ta tòn wě mè kyìn bye ta yòn ke cě ñgyô' wan, ba byin ke tì mwù lè ywum ye mè nlim nyin yili. Ywum màzwùm woli kim ye gwannzi ñzison shin. ¹²Konnêni lè kwù kèn shin, se be lwen ke nyinnim ðwum be limmi kan Mvènnswæb nun. Kwo fe' be twe' byin lè mè ci-ncí byebbi, se ye bon be nywi dólè' le be limmi lwen ne byin ta cì, be fe ñtwu lè Mvènnswæb kwan se nun ywime bèn.

¹³Ke ntwi' Yesù Kristò, beêni ywòli lè mè ci-zwi' be cinni ñkimmò' ke ñgyò' zwem. Byin be ywòli lè m̀vèn ndwun ne cinni ñkimmò' hwæn, ¹⁴bon lè mè gwemná bye nun kèe ke yi cìcì bǎ byi bi yennzi mè ci-ncí byebbi vènè', byi bi twuli tì ku' ðwum bye ta lwen cí. ¹⁵Swum se Mvènnswæb yili à si le byin twò' mè shì-nlìmmì mè ñwum lè lwen ne byin ta cì. ¹⁶Cièni ywum hwæn wě ðwum bye lè mè mwù nyan, son, ba byin fókà' le, ke byin bi lè mwù nyin, byin woli byin ci byebbi be nyènye. Cièni ywum ye lisa' le byin bi mè ci-she Mvènnswæb. ¹⁷Byin mwumzi ðwum hwæn, byin yili mè ñgyinni ðwum Yesù Kristò. Yièni Mvènnswæb, byin mwumzi tì ku' m̀vèn ndwun.

She se yili le mè ci-she ci lè ðwumñkàm byan

¹⁸Byin, mè ci-ncí she, beêni ywòli lè ðwumñkàm byin, byin mwumzi bon lè ñlim fò', kwo fe' nyě ñsàsi, kwo fe' nyě ñlim zwum ñǎli. ¹⁹À si lwen ke me' Mvènnswæb she mwum tá fyimni kwan se be ta nun vènè' yennzi d'ind'in, shìkì à limmì le' ndò', ntwi' se nun yili Mvènnswæb. ²⁰Yà se ne byin ye cinni beshe byin ci byebbi, byin kà fyimni kwan se be ta byin bo? Se bǎn. Son, beshe be yennzi byin vènè' ntwi' se byin ciâ lwen, byin fyimzi nun, à si swum lwen ke me' Mvènnswæb. ²¹Ke ntwi' màzwùm se Mvènnswæb loin byin le byin ci li. Ntwi' se Yesù nun ne' yenne vènè' ntwi' yin, li, à d'onnzâ ku' byin mbòkì be lè byin ðwon ku' ðwæb shon. ²²Nun, à cìe kăn byebbi ndò', shìkì ñzàè' le' mè mbwè' ndò' kwan ku' nun ñwum. ²³Kwan se be semme nun, à fyònnze kăn be lè ñsèm. Kwan se be yennze nun vènè', à shèe kăn lè ðwum màzwùm le bon bi ye yenni be bon lè byi. Son, à tèle zwùm lè Mvènnswæb, nun ne tá kyità' linni ke mbyi nun. ²⁴Nun ne', Yesù Kristò ne shee mè byebbi nyè' hwæn ke nywi yon kwan se be ywummæe nun ñgæ' mè b'òtò' zwem. À shee nun li bǎ ðwi' kyiiilè lè byebbi, ðwi' ton tòn she lwinni. Mè mbon bye be dyemnzæe nun, bon be kimnzâ byin. ²⁵Byin be mbyî wě mè pò' bye ðwuâ, son jene, be fyòsâ byin be ke cí ci-mbòn me pò' ne tá ñzison shin b'ón.

Mbòki tòn ne yili ke nyinnim me dweb lè mè yib

3 ¹Ti lè byin mè yib, kyìbsèni mè dweb byin. Li, beshe ndò' ni ke nyinnim shan nun nyè tà ka mbyi Yesù dwon, byin shi fe' nun le' Mvènnswæb shě, à yě kwù kěn lwen shin yenni, à dunmi mbyi Yesù dwon. ²Ntwi' se nun yě yen wě tà she kwù kèn shin si lwen ñzwònzwò', kònnđi lè ñmwumnzi ye byin ta ti bon mwumnzi. ³Ba ñlim suku' byin ðyi lè ñfòsì kwæ' nywi shin. Ñfòsì kwæ' nywi màzwùm yi le: ñlànzi kwan ke ntwæ' mwu nun, ñswòn ywum nyànnga', lè ñswi me plè ye lòn mèan. ⁴Son, swum se ðyi lwen, a si le mè nlim nyin be ñlwukea. Mè nlim be ti ku' byin zwum ñfòkea. Ntwi' lwu se ke me nlim nyin nun tà ka gwàn, son màzwùm se ta Mvènnswæb ñlim lwukea ñzwònzwò'. ⁵Mè yib bye be mbyí, bye be Mvènnswæb dwon, li ne bon be kwæ' nywi shan fòsi, be kyìbsì ti ku' mè dweb byan. ⁶Cèèni fe' Sarà ne be myí Abrahâm, à be nun mwumnzi, à lon nun le nyeli nyon. Byin bi jene wě ðwen byon beshe byin ci ku' lwen wě nun, shìki byin yi ku' swum ndò'.

⁷Ti ku' byin mè dweb, kwan se byin ye tòn lè mè yib byin, ba ñlim fye byin le be ba ñlim zwum kimmi wě byin. Twelèni bon kyibli ke me' yin, ntwi' se byin limmi le byin ye ñzison ðwùmðwùm cinni fya' Mvènnswæb byin lè bon ñbanmban. Byin ci li, lè Mvènnswæb yě mè ñkeli nyin ywo.

Ñdikà' nyen vèné' ke mbyi Mvènnswæb nun

⁸Mmlòkà' nzæ' le' yém yi le, byin hwæn, tòènni ñwum fò' ke nyinnim shin nun, byin ywò' kwènnzi nlim lè ðwùlu. Byin yili ti byin ne' ke nyinnim shin nun, byin ci lwen lè mè ñgyinni, byin fyòsi ti ku' byin ne' sisò' ke me' ðwulu. ⁹Beshe mwum ndò' cì wù byebbi, ba wù fyòsi nun be lè byebbi. Mwum ndò' sèm fe' wù, ba wù fyòsi nun be lè ñsèm. Son, fyònnzi nun le: «Mvènnswæb fe fɔa.» Ntwi' se Mvènnswæb loen byin le byin lwinnzi ywum màzwùm bǎ byin yé ñngànni ye nun cie byin ñkàli le nun yě byin fe. ¹⁰Be kò' ke ðewǎ Mvènnswæb nun le:

«Mwum ne yili nun ndwæ' tòn shon fe ñgyò' wan, lè mè ñgyìn lan ti ku' nun nywi lwukea,
à kyiiil lè ñzæ' le' byibbɔa,
à donnzi ti ku' ñshè me mbwè'.

¹¹À yonnzi nyè lè ñcì byebbi, à fyòn lwen cǐ,
à kǎb mbyi ne nun yě cì fɔa ðun ke nyinnim ðwum nun.

¹²Ntwi' se me' Mvènnswæb yi ke nywi ðwum lwinnɔa.

Mè ywi' byon ta ywum ye bon ta cibbi ywo.

Ti lè ðwum bye ta byebbi cǐ, ǎ tà ka zwi' ðwí lè bon.»

¹³Beshe byin ta ñlim ké ke ncì lwen nun, yà mwum ne ye byin byebbi cí? ¹⁴Kwo fe' beshe byin yen vèné' ntwi' lwen ne byin ta cì, tòn lwen si lè byin. Li, ba byin yi ðwum bye yili bon ci byin byebbi. Ba byin ton ku'

lè mè mfyonnga'. ¹⁵Son, feêni Yesù Kristò òntwu ke me nlim nyin nun, nun kyishon ne ðyi Nyeli nyin. Fòsêni swum se byin ye fyònnzi lè ðwum bye ta byin swum se ci byin ta zwùm teli lè Yesù Kristò cibbi, li, byin ye limmi swum se byin ye bon fyònnzi kwan mèan hwæn. ¹⁶Kwan se byin ye bon fyònnzi, byin fyonnzi bon sèbi ke ñkwu pen nun. 'Byin be ñlim zwum pyi ke nywi ywum ye byin ta ci, li, kwan se ðwum ta mè mbwè' shě ke nywi yin, be simmè' byin, kwènnjin ye bon fyò ðænni ntwi' se be limmâ byebbi ne bon sheâ ke nywi kwù kèn lwen shin she ke mbyi Yesù Kristò nun. ¹⁷Ñdikà' she byin ta vèné' yenni ntwi' se byin ta lwen cì, beshe ñyili Mvènnswæb ye, lè she byin ye vèné' yenni ntwi' se byin ta byebbi cí. ¹⁸Yesù Kristò nun ne' ywie kàmmi fò' bǎ nun lwinnzi she shon ntwi' me byebbi nye'. Nun ne mwum ñlwinni, à ywie ntwi' ðwum byibba. À cie li lè nun kennzi byin ke cí Mvènnswæb. 'Bwum wue kwæ' nywi shon, son, Mvènnswæb fæe nun ñzison be. ¹⁹Mvènnswæb yimnze nun li, ke nyé yi, à wa', à kèn le'-Nswæb shě lè mè swæb bye ta tòn kpimmea ke cí ðwum ywi. ²⁰Mè swæb màzwùm be ðwum bye fyinnze ñwum Mvènnswæb ke kwan Nòè. Mvènnswæb bæne ñlim lè bon ñgyin mèan kwan se Nòè be ci' ndwun pèa, son, be yònnze kǎn mè nlim. Son se ci ðwum be sue ku' ðun kwe ci' nun be kwæ', be be ðwum nini bye sue mlá' nywæli. ²¹Mlá' màzwùm yi wě mlá' ñjimnzi ye ta ðwum swæti jene. Ñjimnzi ye be ta byin jimnzi ye, a ba swum fò' lè m̀bosi ye byin ta nywi bosi, son, ye lisa' ñfe ye byin ta byin ne' fe lè Mvènnswæb lè ñlim fò'. Ñjimnzi màzwùm ta byin swæti ke ntwi' Yesù Kristò yimná ke ywi nun. ²²Nun ne nèan ke ðeb, à bænnâ cí tòn ke fya' ji Mvènnswæb, ke kwe à tá mè cikpu' Mvènnswæb wyo bon lè mè ñkimmò' ne kwe nlim ðeb hwæn.

Ñkyiili ye lè byebbi ne byin be ci mbyi

4 ¹Ke vèné' ne Yesù yenni ke cě ñgyò' wan nun ntwi' yin, kèèni ke mwu yin nun le byin ye ku' vèné' yenni wě nun. Ntwi' mwum ne tá vèné' yenni wě Yesù, à kyiila' lè byebbi. ²Ke tòn se nun tá tòn ke ñgyò' wan nun, à bǎ tí ywum cí wě tà she ñlim yon ta yili, son, à yě ci wě tà she Mvènnswæb yili. ³Ke kwan se be mbyi nun, byin be kwan ðwuli ñzwònzwò' ke ywum ye mè nshì-ñlimmi yili ñci nun. Ywum màzwùm be le: byin be byebbi cí kwan hwæn wě tà she mè nlim nyin be yili, ywum byibba ye byin be su' tæm, byin lan sòà ke ñdàli ñgwìn me swæb nun. 'Byin be ñkan ywi, byin mwumnzi tí ku' yi fòki me swæb, swum se ðyi swum kwènnjin. ⁴Son jene, kwan se mè nshì-ñlimmi ta kèn wan yan ji, lè be yen le byin tà ka tí ðun ke læm shan nun, shimmea ta bon cí, be ðunmi byin kòlea. ⁵Son, nywò' ndò' kà ðènkà', be ye ðyi ke swi' Mvènnswæb, be ðunmi sù lè mè ñwum nyan swum se bon be ci. Nun, Mvènnswæb, à ni ke mbònnjǎ' nun bǎ nun lannzi ðwum bye ke lè me' lè ðwum bye ywiâ nùn mè kà'. ⁶Li ne ci, Yesù Kristò kènne Ñtwum Lwen shě cě ðwum bye ywiâ nùn, bǎ be cinni ñzison m̀banmbo' wě Mvènnswæb ke

ɲkimmɔ' Mpùn Nsanmi nun, kwo fe' she kwan se bon be lè me', Mvènnswæb lannzâ bon mè kâe' wě tà she nun tã bwum hwæn mè kâe' lannzi.

Mè ci-nci she lwen ke nyinnim bwulu nun

7Mmlàkă' ɲgyɔ' wan ti kwukwæ'. Ke à si li, beèni kwan hwæn bwum bye cinni mwù, ba kɪ byin donnzi bwæ' ci byin lè ɲkeli Mvènnswæb. 8Swum zwimbyi' si le, yilèni bwùlu kwan hwæn lè ɲlim fɔ'. Ntwi' kwan se byin ta bwùlu yili, byin ta ɲlim fyeli lè byebbi ne bon ta ci. 9Yèèni bwùlu ke me dʒwòn byin lè ɲlim fɔ', ba byin ɲgunnà' bon. 10Ke Mvènnswæb fee byin mè ɲkimmɔ' ncɪ ywum kyikyɪ, à si lwen le mwum hwæn ci kon lè ɲkimmɔ' yon, à ci she lè yon, bǎ nun kpa' bwùlu. 11Beshe mwum cinni ɲkimmɔ' nshě le'-Nswæb, à she ku' ɲzǎ' le' ye wai ke ɲwum Mvènnswæb. Mwum nyě cinni ɲkimmɔ' mkpa' bwulu, à kpa' bon lè ɲkimmɔ' ye Mvènnswæb fe nun. Ke nyě ywum màzwùm hwæn, byin ci li bǎ bwum fe ɲtwu lè Mvènnswæb ke ntwi' Yesù Kristò. Nun ne cinni ɲtwu lè ɲkimmɔ' kwan hwæn. **Àmèn.**

Mfyimnzi vènè' ke ntwi' Yesù Kristò

12Mè ɲwè byêm, ba shìmmea ci byin lè mè vènè' ɲkimmɔa ne tà byin kɪn bwebbi ke tòn shin nun, wě swum nywæb ndɔ' se ben byin nywi. 13Fyòènni dàli nùn, ntwi' se byin dʒuân ke vènè' fɔ' nun lè Yesù Kristò. Lè nywɔ' ne bwum ye ɲtwu yon yenni, byin ye ku' be lè ɲdàli ɲzwɔnzwɔ'. 14Tòn lwen si lè byin beshe bwum ta byin sɪmmɔa ntwi' se byin bi bwesɔ' Yesù Kristò. Ntwi' se byin bi kwan hwæn lè Mpùn Mvènnswæb ne cinni ɲtwu à làn ywum hwæn ke nywi. 15Ba kɪ mwum ndɔ' ke nyinnim shin nun yen vènè' ntwi' se à ni ci-ɲwuka' bwum, shindɔ' à ni ci-nyibbɔ' nywi', kè shindɔ', ci-ncikà' me le' mbyibbɔa, kwo fe' ci-dunna' ke me le' bwùlu nun. 16Son, beshe mwum yen vènè' ntwi' se à ni mwum Yesù Kristò, ba kɪ kwènnjin bæen nun. À fyòn Mvènnswæb osòkɔ' yili lè ɲsean ye be ta nun jin mwum Yesù Kristò sean nywi.

17Kwan nlin kyità' wolâ. Mvènnswæb yě seti kyità' linni ke nywi bwum byon. Beshe nun seti kyità' linni ke nywi nyè', a ye làn ke nywi bwum bye tà ka mwù ké ke le' Ntwum Lwen yon nun le? 18Ntwi' se be kɔ' ke dèwǎ Mvènnswæb nun le:

«Beshe bwum lwinni ye swæ' tè',

be bwum byibbɔa bye limmi kan Mvènnswæb, mbyi nyan yě be dýè le?»

19Li, bwum bye ta vènè' yenni ntwi' se Mvènnswæb ne yili, be ken mbyí lè ɲci lwen, be shinnì tì bon ne' ke fya' Mvènnswæb ne fɔ' bon, à cì tì ywum hwæn wě tà she nun shèe.

Ndeb ye Piêr be bwumɲkàm nyenswæb lebbi

5 1Jene, mùn yili mùn le' lè byin bye bwumɲkàm nyenswæb. Mùn, mùn ni ku' mwumɲkàm nyenswæb wě byin, mùn be tì ku' kwe

kwan se be be Yesù Kristò vènè' yenni. 'Bwi' lè byin, fwi' ye ñtwu ye Mvènnswæb yě fwi' kwàsi cinnèni mbanmban. Ke à si li, mún tà byin dɔa le: ²Bænnèni le ñkwìn fɔwum ye Mvènnswæb fe byin fya' lwen, byin bon yon wě tà she ci-mbòn me ɔɔ' tã konni lè mè ɔɔ' byon. Byin bon yon lè ñlim fɔ' wě tà she Mvènnswæb yili, ba kì se be byin nywi wě dólè'. Dylèni mè nlim nyin ke she màzwùm nun, shìkì byin ke ñlim ke lòn ye be ye byin dèbbi nun. ³Ba byin ywɔ' fɔwum be Mvènnswæb fe byin fya' le byin konni lè bon, son, liseàni bon mbòkì kwú kèn she lwen se bon ye fɔwon. ⁴Beshe byin ci li, nywɔ' ne Ci-mbòn me ɔɔ' ndwun yě bèn, à yě byin dàsi ndwun fe, dàsi nyě tà ka gwàn.

⁵Ti lè byin mè mbìpàn, kyìbsèni fɔwumñkàm byin. Mún shè tì ku' lè byin hwæn le: fyòsèni byin ne' sisɔ' ke me' fɔwulu ke nyinnim shin nun. Ntwi' se be kɔ' ke dèwǎ Mvènnswæb nun le:

«Mvènnswæb yili kan mè ci-nshela' nywi,
fɔwum be nun tà ñlim kwènnzi lè bon, à bi fɔwum bye ta bon ne'
tweli lè yì lwæb be fɔwulu.»

⁶Ke à si li, fyòsèni byin ne' ñgyɔ' ke swi' Mvènnswæb, nun ne cinni ñkimmɔ' ke nywi ywum hwæn, bǎ nun wasi byin nywɔ' ne ñgyin ne nun ké yě wòlì. ⁷Donnzèni nun mè le' mfyonnga' nyin fya' hwæn, ntwi' se nun ne ta konni lè byin.

⁸Konnèni, byin ton lè me'. Ntwi' se ci-byinnì nyin Satèn tã yòn ke ke shin wě gbêm ne tã fàn, à tã mwum ne nun yě ji kæbbi. ⁹Ba byin donnzi nun pon bǎ nun ci byin swum ndɔ', son, dylèni kimmi ke mbyi Mvènnswæb nun. Byin limmi lwen le mè ñgyinni byin fɔwum Yesù Kristò ke ñgyɔ' wan hwæn ta ku' vènè' yenni wě byin. ¹⁰Son, ke nyě ye byin ye vènè' yenni ke kwan kwæ' si nun, Mvènnswæb ne ci-kwènnzi nlim, à yě byin fyòsi be ke tòn lwen nun, à kimnzi byin, à dylì tì ku' byin kimmi ke mbyi nyon nun. Mvènnswæb loàn byin lè byin kiin tòn byin lè Yesù Kristò ke ntwu yon nun kwan hwæn. ¹¹Nun ne cinni ñkimmɔ' kwan hwæn.

Àmèn.

Mmlòkà' nzæ' le'

¹²Silvèn ne kpa' mún lè ñkɔ' mwen dèwà ne tòn ne. Mún tã nun tweli wě ñgyinni nyèm ne tã she Yesù Kristò cí lè ñlim fɔ'. Mwú ñkɔ' dèwǎ màzwùm yi le mún kimnzi byin ñlim ke zwum, lè mún she tì ku' byin le kwènnzi nlim Mvènnswæb si tì ku' wě tà she mún kɔ' si. Bænnèni son mè fyà' bí.

¹³Bwum Yesù Kristò bye ke cě **Bàbilôn**, bye Mvènnswæb yàen ku' wě byin, be ta byin hwæsi. Mwen nyèm Markù tà ku' byin hwæsi. ¹⁴Hwæsèni byin ne' lwen ke nyinnim shin nun wě tà she se yili le mè ñgyinni hwæsi bon ne'. Byin be dylì bæti lè Yesù Kristò, Mvènnswæb fe byin fɔa, byin hwæn.